



DEO OPTIMO MAX.

UNI ET TRINO.

VIRGINI DEIPARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS  
*manè discutienda, in Scholis Medicorum, die Jovis trigesimâ-primâ  
Martii, anni M. DCC. XXXV.*

M. PETRO AFFORTY, Chirurgiæ Professore  
designato, Doctore Medicò, Præsìde.

*An Feminis eadem, quæ Maribus, corporis & animi exercitiâ?*

I.



EMINA, Divinitatis opus, humanitatis honos, nîdem è principiis conflata quibus & mas, eodem quoque patri eâitâ quondam fuit; æquè particeps, ut ille, corporis affectionum; nec animi dotibus ab eo degener. Inde mas feminâ non potior. Alter ab alterâ num in corde, num in cerebro discrepat? In utroque nonne lien, hepar, pulmo, renes, plantæ consumiles? Frontis annon eadem dignitas? ossium, cartilaginum par numerus? Vasorum propagines

an aliis virile corpus, aliis muliebres succis alliant? Hujus & illius animata compages an diversis moveatur musculis? Nonne & ambobus est necessaria victus & Medicinæ communitas, æquale viræ stadium, mutuos ad amplexus amulæ propensio? Nunc utile minus, quam dulce connubium, pulchrâ dum sobole facit utrumque parentem. Dulcis hæc proles, nuptiarum est messis haud ingrata, quam parit cum conjuge conjux. Sic patrum in natos divifum est cum matribus imperium. Inter te tam benè si conveniant utriusque sexus homines, an illa quæ viro concedis exercitia corporis & animi, mulieri denegabis?

## II.

MOTUS expers nulla corporis pars, functio nulla. Corporis exercitium, ut maribus, sic feminis familiare, natis cœvum, veluti nascituris. Fetus, vel mas vel femina, diversumne ponit exercitationis tirocinium, dum conclusus in uteri latebris æquo pulsat pede viscera parentis nec impari calcitratu suum rumpit carcerem lucis usurâ fruturus? Annon & in cunis sua peculiaris est infantulis exercitatio, quæ cadit in utrumque sexum? Quin & puellæ, quæ factæ sunt atatulæ paulo provectiores, æqualibus cum pueris mille exercentur modis, choreis indulgent, saltationi, pilæ volatili, concentibus, ambulationi Annis postmodum accedentibus, quot virgines teneræ, quot nuptæ mulieres, dum sui juris sunt, equitant sessione masculâ, venantur, natant, piscantur! Sunt, quæ sub dio versantur inter armatos sexum mentitæ, quæ viris ipsis martios affundunt animos, quæ trans mare currunt mercataram facturæ. E plebeis reperias, quæ cum viris terram colunt, arant, fodiunt; quæ serunt arbores, metunt segetes, ulmos maritant vitibus. Gemunt aliæ sarcinarum sub pondere, sudant, algent; aliæ pernoctant humi, tota die pedes eunt redeuntque vias quàm longissimas. Tot exercitationum labores ferunt & utero gerentes, mox daturæ progeniem valentissimam. Desinant igitur urbana mulieres exercitia præ gravitate reculare, fugiant mollisior & umbratilis vitæ delicias, fetui simul & fetæ mala innumera parituras. Nec aliunde fortassis est, quod prægnantes olim matronæ, suis stipatæ conjugibus, dicata Junoni Lucinæ templâ pedibus adire jubebantur. Nunquid, ut religionis, sic & exercitationis ergo, sancita lex ista fuerat?

## III.

Q UOD Ars Medica mulieribus imperat, docet idem belluas Natura. Earum femellæ, gravidæ licet & ad pariendum vicinæ, nonne suos hîc & illic errantes comitantur mares? Nonne oves gradiendo, cervæ pascendo deponunt fetus absque molestiâ? Sua pisces agitando profluenti tradunt ova, sua quoque versantur eidem vel incubantes oviparæ. Quid quod aves, cum maribus plurimæ summis nidificant in arboribus, ut in nido, velut in pensili lecto, pullata flatibus ova venti motum sequantur; adeo verum est animal omne motu generari, motu conservari. Hinc in hominum genere quisquis ad exercitationes erit impiger, erit & ille sanitatis integer morboque purus. Et quidem, labore si dissipantur humores qui exa-

berant in corpore, humorum redundantia si mulierem magis quam virum putas obnoxiam, feminis ergo laboriosiora quam maribus, aut æqualia saltem præscribes exercitia. Eâ sanè de causâ quot infirmos homines utriusque sexûs invenias & in tenui panno & in purpurâ decumbentes, qui feliciter uno eodemque tempore convalescunt, dum languida similibus committunt exercitationibus corpora? Quoties viris ac mulieribus in ultimas quondam terras simul exportatis utile fuit exilium, secundæ valetudinis recuperatione, quam siccatis antea benè multis pharmacorum calicibus assæqui non potuerant?

#### I V.

UT corpori, sic animo sua sunt exercitia. Agitationes animi quis non sentit in exercitationibus ingenii? quis variis in affectibus, quis in cogitationibus non deprehendit? Hæ sunt exercitationes animi, hæc curricula mentis, æquè nota viris ac mulieribus. Reverà, si sexu carent animæ, si nec origine, nec agendi ratione dispares, cur in mare, cur in feminâ diversis illæ motibus cicerentur? Vis illa mirabilis, quâ diriguntur in uterolis humanæ primordia, cur in utroque sexu, similes ad informandos fetus ingenii, similia non aptaret cerebri loca quæ frequentat animus? An alius in viro, alius in muliere typus hominis? Uterque nonne conditus ad Creatoris imaginem? Nonne rationis compos & intelligentiæ? Proinde politicarum rerum sicut & artium liberalium cognitio feminis non minor quam viris relicta est. Has si plerumque lex removel à publicis & civilibus officiis, an quia legis auctores sunt viri, qui regiminis & imperii sui socias mulieres non patiuntur, haud ignari quid ubique femina possit? Nimirum, cùm semel est admissa mulier in optatum conciliis, omnium sæpe voluntates ac studia rapit ad se, necessitate quâdam amabiliter imperiosa; persuadet, si proponit; si petit, impetrat. Demum quid hominum mentes acuit & exercet solertiùs, quid edaces eorum curas fallit ingeniosius, quam cordatæ mulieris blanda colloquio? Si pietate graves, si austerè ac religiosè degentes viros hodiè suspicimus, veneramur; quam frequens est aliunde chorus virginum in eodem sanctitatis curriculo unâ defudantium, quas laudare facilius est quam imitari! An non & suis gloriatur hæc ætas mulieribus, quas ut viros expolivit urbanitas, ingenii perpicacitas erexit, prudentiæ maturitas informavit? Nec defunt, quæ picturam profitentur, poesim callent, historiam tractant, mathesim, philosophiam. Extant & feminae principes, quæ mari, terrâ, domi, militiæ, populos sapienti regunt imperio. Equis posthæc non intelligit mulieres cogitare sapienter, cogitata viriliter exsequi? Quis utrique sexui datos à Deo similes non agnoscit igniculos, quibus vir & mulier ad summa quæque certatim evehuntur, quoties ambobus eandem licuit exercere studia disciplinarum?

#### V

SI feminei corporis teneritatem objicis, si sustinendis virorum exercitationibus parem negas, complures diversi sexûs homines paululùm cir-

4

cumspice , delicatulos totidem numerabis viros quot & feminas. Utroque tamen observabis ad exercitia passibus æquis & animosè concurrere , si teneris ab annis ignaviam fugerint , iisdem paulatim assuefacti laboribus. Sic molle puellarum corpus ordinata firmat exercitatio. Imò , robustum licet natura virum sinxerit , is tamen suas brevi sentit vires languescere , nisi frequenter exerceatur. An quoniam velut exercitatione citius amandantur è corpore viles alimentorum reliquie , similiter inertia retinentur , sanguinis & spirituum commeatui moram allaturæ ; unde corporis & animi stupor otiosorum hominum commune stipendium ? Cur non paucas affligat feminas hæc invaletudo , haud aliam suspicari causam licet , nisi desidiosum vitæ genus , ad quod illæ sæpius à viris se damnatas esse conqueruntur ; an jure vel injuriâ , pronunciet qui noverit utriusque sexus æqualitatem ? Non itaque nara mulier , ut in umbrâ parietum domestica tantum curet negotia ; non facta conjux , ut in solis hæreat mariti complexibus , sed ut etiam cum viro cetera corporis & animi dividat exercitia , quibus illam non imparem doceret ratio , confirmat experientia.

*Ergò Feminis eadem , quæ Maribus , corporis & animi exercitia.*

Proponerebat Parisiis , LUDOVICUS-JACOBUS PIPEREAU ,  
Rothomagensis , Baccalaureus Medicus , A. R. S. H. 1735.  
à sextâ ad meridiem.